

Inachukua Muda

Mimi, Bwana, nalilinda, Nitalitia maji kila dakika, Asije mtu akaliharibu; Usiku na mchana nitalilinda. Isaya 27:3.

Akili ya mwanamume au mwanamke haishuki ghafla kutoka katika usafi na utakatifu hadi kwenye uovu, uharibifu na uhalifu. Inachukua muda kumgeuza mwanadamu kuwa wa Mungu au kuwashusha wale waliofanywa kwa mfano wa Mungu kufikia kuwa wanyama au mashetani. Kwa kutazama tunabadilika. Ingawa ameumbwa kwa mfano wa Muumbaji wake, mwanadamu anaweza kuielimisha akili yake kiasi kwamba dhambi ambayo hapo awali aliichukia itakuwa ni ya kupendeza kwake. Kadiri anavyoacha kukesha na kuomba, ndivyo anavyoacha kuulinda ngome, moyo. ... Vita vya kila siku dhidi ya akili yenye tamaa za mwili ni lazima vidumishwe; na ni lazima tusaidiwe na mvuto ule utakasao wa neema ya Mungu, ambao utavutia akili kwenda juu na kuizoeza katika kutafakari mambo safi na matakatifu.

Tabia haiji kwa bahati. Haiamuliwi na mlipuko mmoja wa hasira, hatua moja katika mwelekeo mbaya. Ni kurudia rudia kwa tendo lile lile linaloisababisha itendeke ndiko kunakoifanya kuwa mazoea na kuifanya tabia kuwa njema au mbaya. Tabia sahihi zinaweza tu kutengenezwa kwa bidii ya uvumilivu, isiyochoka, kwa kutumia vizuri kila kipaji na uwezo tuliokabidhiwa kwa ajili ya utukufu wa Mungu.

Mungu anatarajia tujenge tabia kulingana na mfano uliowekwa mbele yetu. Tunapaswa kuweka tofali baada ya tofali, tukiongeza neema juu ya neema, tukitafuta sehemu za udhaifu wetu na kuzisahihisha kulingana na maelekezo yaliyotolewa.

Mungu hutupa nguvu, uwezo wa kufikiri na muda, ili tuweze kujenga tabia ambazo anaweza kuweka muhuri Wake wa ukubali. Anataka sana kila mtoto Wake apate kujenga tabia bora, kwa kufanya matendo safi na bora, ili mwishowe aweze kuwasilisha jengo lenye ulinganifu, hekalu zuri, linaloheshimiwa na wanadamu pamoja na Mungu....

Yeye ambaye angependa kukua na kufanyika kuwa jengo zuri kwa Bwana ni lazima aendelee kila uwezo wa nafsi. Ni kwa matumizi sahihi peke yake ya vipaji ndipo tabia inaweza kukuzwa kwa upatanifu. Kwa jinsi hiyo tunaleta kwenye msingi kile kinachowakilishwa katika Neno kama dhahabu, fedha, mawe ya thamani—vitu ambavyo vitahimili jaribio la moto wa Mungu utakasao.